

每週經課朗誦經文(巴克禮漢羅/教羅)2013/12/15

共同經課 - 1

以賽亞書三十五章一節~十節

1 曠野 kap 乾燥 ê 地的確歡喜；沙漠亦 beh 快樂，koh 親像玫瑰開花。2 伊 beh 開花茂盛，來歡喜，beh 有歡喜 kap 唱歌；黎巴嫩 ê 榮光，Ka-bit kap Sa-lûn ê súi，beh 歸伊；in beh 看見耶和華 ê 榮光，咱 ê 上帝 ê 美妙。3 Lín tiòh hō 軟弱 ê 手勇壯，無力 ê 腳頭 u 自在。4 對小膽 ê 人講，Lín tiòh 剛強，m̄ 免驚；看 ah，lín ê 上帝 beh 來報仇，beh 來行極大 ê 報應；祂 beh 來拯救 lín。5 Hit 時 chhiⁿ-mî 人 ê 目睷 beh 開，臭耳人 ê 耳孔 beh 利。6 Hit 時跛腳 ê beh tiò 跳親像鹿，啞口 ê 舌 beh 唱歌；因為水 chhèng 出 tī 曠野，溪流 chhèng 出 tī 沙漠。7 發出光 ê 沙，beh 變做水池，乾燥 ê 地 beh 變做水泉；tī 山狗 tó teh 困 ê 所在 beh 有青草蘆葦 kap 蒲草。8 Tī-hia beh 有一條高 ê 路，chit 條路 beh 稱做聖 ê 路；污穢 ê 人 boē 得 thang 經過；專專 beh 做 in ê 路用；行路 ê 人，雖然愚戇，亦 boē 行錯。9 Tī-hia 的確無獅，猛獸亦無上 chit 條路；tī-hia lóng 無 tú-tiòh in；獨獨得 tiòh 贖回 ê 百姓 tī-hia 行。10 Koh 耶和華救贖 ê 百姓 beh 倒 tng 來，beh 唱歌來到錫安；得 tiòh 永遠 ê 歡喜做冕旒；in beh 歡喜快樂，憂悶吐氣 lóng beh 走去。

共同經課 - 2

路加福音一章四十七節~五十五節

47 我 ê 神因為救我 ê 上帝來歡喜。48 因為伊看顧奴婢 ê 卑微；Tùi taⁿ 以後萬世代 beh 講我有福氣。49 因為 hit-ê 有權能 ê 為 tiòh 我做大 ê t̄ai-chì，伊 ê 名是聖。50 敬畏伊 ê 人伊憐憫 in，到代代。51 伊 bat 用伊 ê 手出氣力，心志驕傲 ê 人伊有趕散 in。52 有權能 ê 人，伊 lut in ê 位，卑微 ê 人，伊升 in 做高。53 Iau ê 人伊用好物 hō in 食到飽，富 ê 人，伊 hō in 空空 tò 去。54 伊扶助伊 ê 奴僕以色列，來記念憐憫，55 (照伊對咱 ê 祖所講 ê 話)，來施落 hō 亞伯拉罕 kap 伊 ê 後裔到永世代。

共同經課 - 3

雅各書五章七節~十節

7 兄弟 ah，所以 lín tiòh 常常吞忍，到 tī 主 ê 降落。你看，作穡人 thèng 候地上寶貝 ê 土產，常常吞忍 teh thèng 候伊，到得 tiòh 秋霖春雨。8 Lín 也 tiòh 常常吞忍，堅固 lín ê 心，因為主 ê 降臨近 lah。9 兄弟 ah，莫得相怨妒，免得 lín 受審判；你看，審判司已經 khiā tī 門口。10 兄弟 ah，hiah-ê 託主 ê 名來講 ê 先知，lín tiòh 取 in 做受患難吞忍 ê 模樣。

共同經課 - 4

馬太福音十一章二節~十一節

2 約翰 tī 監裡聽見基督所行 ê 事；就差學生問伊講，3 所 beh 來 ê，是你 mah？á 是阮 tiòh ng 望別人 ah？4 耶穌應講，Lín tiòh 去，將 lín 所聽見所看見 ê，kā 約翰講；5 就是 chhiⁿ-mî ê 看見，跛腳 ê 行，thái-ko ê 清氣，chhàu-hī 人 ê 聽見，死 ê 人 koh 活，sòng-hiong 人得 tiòh 聽福音。6 見若無 tī 我來 tiòh-tak ê，有福氣。7 In 去 ê 時，耶穌 chiah 提起約翰，kā 眾人講，Lín 前出去曠野，beh 看甚麼？是蘆竹 hō 風吹振動 mah？8 Lín 出去 ài 看甚麼？是人穿幼軟 ê 衣裳 mah？你看，穿幼軟 ê 是 tī 王宮。9 若是 án-ni lín 出去 beh 啥事？是 beh 看先知 mah？是 lah。我 kā lín 講，伊是 iáu khah 贏過先知。10 Chit 人就是經裡所指 ê，講，我差我 ê 使者 tī 你 ê 面前；伊 beh tī 你 ê 頭前備辦你 ê 路。11 我實在 kā lín 講，婦人人所生 ê，從中 bē 有興起 khah 大 tī 行洗禮 ê 約翰；總是 tī 天國 ê 微細 ê，iáu khah 大伊。